

Na osnovu člana 8. stav 3. tačka 31. i 37. Zakona o principima lokalne samouprave ( „Službene novine Federacije BiH“ , broj 49/06 i 51/09 ), člana 10. stav 1. tačka 2. Statuta općine Centar Sarajevo ( „Službene novine Kantona Sarajevo“ 23/04), a u vezi sa Zakonom o zaštiti i dobrobiti životinja ( „Službeni glasnik BiH“ , broj 25/09 ), Pravilnikom o držanju opasnih životinja ( „Službeni glasnik BiH“, broj 27/10 ), Zakonom o veterinarstvu Federacije BiH ( „Službene novine Federacije BiH“, broj 46/00), Zakonom o komunalnim djelatnostima ( „Službene novine Kantona Sarajevo“, broj 31/04 ), Zakonom o prekršajima protiv javnog reda i mira ( „Službene novine Kantona Sarajevo“, broj 18/07 i 7/08), Općinsko vijeće Centar Sarajevo je, u nastavku 24. redovne sjednice održanoj dana 09.05.2018. godine, utvrdilo

**Nacrt**

## **ODLUKU**

### **o uslovima i načinu držanja kućnih ljubimaca i načinu postupanja s napuštenim i izgubljenim životinjama**

#### **DIO PRVI**

#### **OPŠTE ODREDBE**

*Predmet odluke*

#### **Član 1.**

Ovom se Odlukom uređuju minimalni uslovi i način držanja kućnih ljubimaca, registracija, uslovi kretanja kućnih ljubimaca, naročito pasa i mačaka u javnim objektima i na javnim površinama, koje im njihovi posjednici moraju osigurati radi zaštite životinja i ljudi koji sa njima dolaze u dodir, način kontrole njihovog razmnožavanja, te način postupanja s napuštenim i izgubljenim životinjama na području Općine Centar Sarajevo.

Ova odluka se ne primjenjuje na službene i radne životinje iz člana 2. ove Odluke.

*Pojmovi*

#### **Član 2.**

Pojedini pojmovi u ovoj Odluci imaju sljedeće značenje:

1. kućni ljubimci su životinje koje čovjek drži zbog društva, zaštite i pomoći ili zbog zanimanja za te životinje
2. napuštena životinja je životinja koju je vlasnik svjesno napustio, kao i životinja koju je napustio zbog više sile kao što su bolest, smrt ili gubitak slobode.
3. izgubljena životinja je životinja koja je odlutala od vlasnika i on je traži.
4. opasne životinje su životinje koje zbog neodgovarajućih uslova držanja i postupanja s njima mogu ugroziti zdravlje i sigurnost ljudi i životinja, te koje pokazuju napadačko ponašanje prema čovjeku
5. imalac/posjednik životinje odnosno kućnog ljubimca je svako pravno ili fizičko lice koje je kao vlasnik, korisnik ili čuvar neposredno, stalno ili privremeno odgovorno za zdravlje i dobrobit životinje
  - a) vlasnik životinje,
  - b) odgovorno ili zaduženo lice za životinju
6. pas lualica je svaki pas koji nije pod izravnom kontrolom vlasnika ili ga se ne sprečava u lutanju, što može uključivati i napuštenog/izgubljenog psa. U ovu kategoriju se svrstavaju psi koji:
  - a) imaju vlasnika, ali ipak slobodno lutaju i nisu pod kontrolom imalca ili pod ograničenjem kroz određeno vrijeme,

- b) psi koji slobodno lutaju i nemaju vlasnika,  
c) divlji psi koji su u stvari domaći psi koji su se vratili u divlje stanje i više nisu direktno ovisni o ljudima što se tiče uspješnog razmnožavanja.
7. higijenski servis je služba za prikupljanje napuštenih, izgubljenih i životinja bez vlasnika-lutalice, i predaje ih u sklonište za životinje.
8. radne životinje su psi koji služe kao tjelesni čuvari i čuvari imovine, psi vodiči slijepih i oni koji služe za pomoć, psi tragači i psi koji služe za obavljanje drugih poslova
9. sklonište za životinje (u daljnjem tekstu: sklonište) je objekat u kojem se smještaju i zbrinjavaju napuštene i izgubljene životinje gdje im se osigurava čuvanje i pomoć
10. službene životinje su životinje koje imaju licencu za rad i služe za obavljanje poslova pojedinih državnih tijela.
11. veterinarske organizacije u skladu sa Zakonom o veterinarstvu Federacije BiH („Službene novine Federacije BiH“, broj 46/00 ) su : veterinarske stanice, veterinarske klinike, apoteke kao i samostalna veterinarska praksa
12. Dvorište je preostali dio građevinske parcele, ograđen ili neograđen, koji pripada stambenoj zgradi, porodičnoj kući ili većem broju porodičnih kuća
13. Javne površine su: javne saobraćajne površine, javne zelene površine, površine oko objekta javne namjene i neizgrađeno građevinsko zemljište namijenjeno za uređenje ili izgradnju objekata javne namjene ili javne površine i površine koje planskim dokumentom nisu određene kao površine javne namjene, a dostupne su većem broju građana, kao što su izgrađene i uređene saobraćajne i zelene površine unutar i između blokova zgrada, između zgrada, unutar otvorenih tržnih centara, groblja, dječja igrališta, cvijetnjaci, neograđeni sportski tereni, te neograđena dvorišta škola i vrtića, pasaži i sl.

## **DIO DRUGI**

### **USLOVI I NAČIN DRŽANJA KUĆNIH LJUBIMACA**

#### *Opšti uslovi držanja kućnih ljubimaca*

#### **Član 3.**

Imalac kućnog ljubimca je dužan:

1. osigurati kućnim ljubimcima držanje u skladu s njihovim potrebama, a minimalno predviđenim Zakonom o zaštiti i dobrobiti životinja ( „Službeni glasnik BiH„ , broj 25/09 ), drugim propisima i ovom Odlukom,
2. psima osigurati prostor koji odgovara njihovoj veličini i zaštitu od vremenskih neprilika i drugih nepovoljnih uvjeta za boravak,
3. psima osigurati pseću kućicu ili odgovarajuću nastambu, u skladu sa Pravilnikom o zaštiti pasa koji se drže kao kućni ljubimci („Službeni glasnik BiH“, broj 18/12 ),
4. označiti mikročipom pse i vakcinisati protiv bjesnila u skladu sa Zakonom o veterinarstvu Federacije BiH,
5. onemogućiti bijeg i kretanje pasa po javnim površinama bez nadzora,
6. na vidljivom mjestu staviti oznaku koja upozorava na psa, te imati ispravno zvono na ulaznim dvorišnim ili vrtnim vratima,
7. pravodobno zatražiti veterinarsku pomoć, te osigurati zbrinjavanje i odgovarajuću njegu bolesnih i ozlijeđenih životinja,
8. osigurati kućnim ljubimcima redovnu i pravilnu ishranu, te trajno omogućiti pristup svježoj pitkoj vodi,
9. redovno održavati čistim prostor u kojem borave kućni ljubimci.

Imalac ne smije:

1. zanemarivati kućne ljubimce s obzirom na njihovo zdravlje, smještaj, ishranu i njegu,

2. ograničavati kretanje kućnim ljubimcima na način koji mu uzrokuje bol, patnju, ozljede ili strah.

Zabranjeno je:

1. bacanje petardi ili drugih pirotehničkih sredstava na životinje i prema životinjama,
2. trčanje životinja privezanih uz motorno prijevozno sredstvo koje je u pokretu,
3. držati pse trajno vezane ili ih trajno držati u prostorima ili dijelu dvorišta bez omogućavanja slobodnog kretanja izvan tog prostora,
4. vezati pse, osim privremeno u iznimnim situacijama kada ograđivanje dijela dvorišta nije izvodivo. U tom slučaju pas se može vezati na način da mu je omogućeno kretanje u promjeru 5 metara, a sredstvo vezanja i ogrlica moraju biti od takvog materijala da psu ne nanose bol ili ozljede,
5. trajno i samostalno držanje kućnih ljubimaca na adresi različitoj od prebivališta ili boravišta posjednika, osim u slučaju kada se radi o radnim psima koji čuvaju neki objekat ili imovinu, a posjednik im je dužan osigurati svakodnevni nadzor,
6. držati kao kućne ljubimce opasne i potencijalno opasne životinjske vrste utvrđene u Popisu opasnih i potencijalno opasnih životinjskih vrsta, kako je to regulisano Pravilnikom o držanju opasnih životinja ( „Službeni glasnik BiH“, broj 27/10 ).

#### **Član 4.**

Imalac pasa mora odgovarajućim odgojem i/ili školovanjem ili drugim mjerama u odnosu na držanje i kretanje pasa osigurati da životinja nije opasna za okolinu. Pri odgoju pasa imalac ne smije koristiti metode koje kod pasa mogu uzrokovati bol, ozljede, patnju ili strah.

*Uslovi držanja kućnih ljubimaca u stambenim zgradama i obiteljskim kućama*

#### **Član 5.**

Držanje kućnih ljubimaca u zajedničkim prostorijama zgrada i dvorištima zgrada, kretanje kućnih ljubimaca zajedničkim dijelovima zgrada i dvorištima zgrada, te obavezu čišćenja tih prostorija i prostora koje onečiste kućni ljubimci sporazumno utvrđuju suvlasnici zgrade, zajedno sa predstavnikom etažnih vlasnika i upraviteljem zgrade, u skladu sa propisima o vlasništvu.

Imalac kućnih ljubimaca dužan je držati ih na način da ne ometaju mir sustanara ili na drugi način krše propisani kućni red stambene zgrade i stanara okolnih nekretnina. Držanjem kućnih ljubimaca ne smije biti ugrožena sigurnost građana, njihove imovine i drugih životinja.

#### **Član 6.**

U objektima i zgradama kolektivnog stanovanja, jedno domaćinstvo može držati u stanu najviše jednog psa i najviše dvije mačke.

U dvorištu individualnog objekta mogu se držati najviše dva psa i dvije mačke.

#### **Član 7.**

Držanje kućnih ljubimaca u zajedničkim prostorijama zgrade ( perionica, sušionica rublja, prostorija za rad organa upravljanja zgradom, prostor za smještaj opreme za tekuće održavanje) moguće je samo uz prethodno pribavljenu saglasnost etažnih vlasnika stambene zgrade. Održavanje i čišćenje tih prostorija zajednički utvrđuju predstavnik etažnih vlasnika i upravitelj zgrade.

Imalac kućnog ljubimca dužan je brinuti o čistoći zajedničkih prostorija u kojim se kreću kućni ljubimci, te odmah očistiti ili oprati površinu, ukoliko ju je njegov ljubimac na bilo koji način onečistio ( hodnici, terase, lođe, balkoni, podrumski i tavanski prostor ).

## **Član 8.**

U objektima i zgradama kolektivnog stanovanja, zabranjeno je držanje pasa i mačaka i ostavljanje istih bez nadzora držaoca na balkonu, terasi i lođi koja pripada stanu. U slučaju odsutnosti, držalac je dužan osigurati nadzor i brigu punoljetne osobe za svog kućnog ljubimca u skladu sa njegovim potrebama. Posjednik koji psa drži u stanu ili kući bez okućnice, dužan ga je svakodnevno izvoditi radi obavljanja nužde i zadovoljenja dnevnih fizičkih aktivnosti.

## **Član 9.**

Uvođenje psa ili mačke u lift stambene zgrade, dozvoljeno je samo ako je lift prazan. Prilikom korištenja lifta, stepeništa i hodnika stambene zgrade, pas mora biti na povodcu pod neposrednom kontrolom imaoca i obavezno sa brnjicom za visoke i srednje pasmine pasa.

## **Član 10.**

Imalac psa koji učestalim i dugotrajnim lajanjem, zavijanjem ili grebanjem remeti mir, dužan je odmah preduzeti odgovarajuće mjere kako bi spriječio daljnje uznemiravanje ili ukloniti psa, u skladu sa odredbama Zakona o prekršajima protiv javnog reda i mira, a koji se odnosi na stav o proizvođenju neadekvatne buke.

## **Član 11.**

Psi se mogu držati u dvorištu porodične kuće, zajedničkom dvorištu porodične kuće i u dvorištu sa većim brojem porodičnih kuća u posebnom objektu, po prethodno pribavljenoj saglasnosti svih suvlasnika porodične kuće, odnosno saglasnosti svih vlasnika porodičnih kuća.

Ukoliko se pas drži u ograđenom prostoru za psa ili u kućici za psa, smještaj kućice ili ograđenog prostora treba biti takav da ne ugrožava/ometa stanovanje u susjednom dvorištu.

Objekat za držanje psa iz prethodnog stava ovog člana, mora biti udaljen najmanje 5 (pet) metara od najbliže stambene zgrade ili poslovnog objekta na susjednoj parceli, odnosno da ne ugrožava/ometa stanovanje u susjednom dvorištu.

## **Član 12.**

Pas koji se drži u ograđenom dvorištu ili drugom zemljištu ne mora biti vezan ukoliko ograda svojom visinom i čvrstoćom osigurava sigurnost prolaznika i susjeda. Ulazna kapija dvorišta stambene zgrade ili zgrada, u kome se drži pas, mora biti vidno označena tablom sa crtežom i natpisom koji ukazuje na prisustvo psa i mora imati ispravno zvono na ulaznim dvorišnim ili vrtnim vratima.

Pas koji se drži u neograđenom dvorištu, mora biti sigurno vezan, na način da ne ometa kretanje i sigurnost građana i mora biti smješten u boks koji će osigurati da se životinja neće moći samostalno udaljiti.

Pas se može vezati oko vrata ogrlicom ili kaišem koji se ne usijeca u kožu i koji neće dovesti do povreda životinje.

Imalac psa ne smije vezati psa na lanac kraći od 3 metra ili trostruke dužine životinje, a pri određivanju dužine lanca koristi se dužina povoljna za životinju.

### **Član 13.**

Imalac kućnog ljubimca, koji se o njemu ne može više brinuti u skladu sa obavezama iz člana 3. ove Odluke, dužan je pronaći udomitelja; udruženje ili osobu koja će o njemu brinuti na propisan način ili ga predati u sklonište za životinje, koga u skladu sa Zakonom osnuje fizička ili pravna osoba, te je dužan snositi troškove boravka do udomljenja ili drugog načina zbrinjavanja životinje. Udomitelj može biti punoljetno lice i kao dokaz mora priložiti ličnu kartu, i uz potpis izjave kojom preuzima obaveze prema životinji. Udomljavati se mogu životinje prema propisanim kriterijima i uz prethodno provedene mjere nadležne veterinarske organizacije. Jedno lice može udomiti do 2 psa.

#### *Uslovi izvođenja kućnih ljubimaca na javne površine*

### **Član 14.**

Psi se mogu izvoditi na javne površine ako su označeni mikročipom, na povodcu i pod nadzorom imaoča. Vlasnik pasa i mačaka na javnom mjestu mora imati propisanu službenu ispravu/dokumenat kojim se dokazuje da su uredno registrirani, čipovani, vakcinisani protiv bjesnila i tretirani protiv parazita u nadležnoj veterinarskoj organizaciji u skladu sa važećim Zakonom i ovom Odlukom.

Na zahtjev ovlaštenog organa, nadležnog inspektora ili policajca, imalac ljubimca je dužan ispravu pokazati.

### **Član 15.**

Imalac kućnog ljubimca dužan je pri svakom izvođenju na javnu površinu općine Centar Sarajevo nositi pribor za čišćenje fekalija i u slučaju da dođe do onečišćenja, obavezan je odmah i bez odlaganja isprljanu površinu očistiti i otpad odložiti na predviđeni način i na mjesto određeno za odlaganje ovakvog otpada.

O postavljanju i održavanju opreme za odlaganje fekalija kućnih ljubimaca na javnim površinama, stara se javno komunalno preduzeće odnosno privredno društvo kome je povjereno obavljanje djelatnosti održavanja čistoće.

Troškove postavljanja i održavanja opreme podmiruju se iz budžeta Općine, o čemu će se sačiniti poseban sporazum sa davaocem usluge.

### **Član 16.**

Imalac, kao i lice koje izvodi opasnog psa iz kontroliranog uzgoja ili psa iz pasmine velikih pasa, dužan je psa voditi na povodcu i obavezno sa brnjicom.

### **Član 17.**

Psi po kinološkoj klasifikaciji iz pasmine srednjih i malih pasa ili štenad do 3 (tri) mjeseca starosti, mogu se izvoditi na povodcu bez brnjice, uz uslov da neće ometati prolaznike, djecu, i druge životinje. Imalac životinje snosi punu odgovornost za njegovo ponašanje na javnoj površini.

### **Član 18.**

Pas može biti pušten da se slobodno kreće samo u parku i na drugoj zelenoj površini koja je određena za neograničeno i slobodno kretanje pasa ( u daljem tekstu: „park za pse„). Površine, odnosno mikrolokacije za formiranje parkova za pse definisane su na grafičkom prilogu koji je sastavni dio ove Odluke.

## **Član 19.**

Park za pse uređuje i održava KJKP „Park“ d.o.o. Sarajevo. Finansijska sredstva za uspostavljanje, obilježavanje i održavanje higijene u parkovima za pse će obezbijediti Općina Centar Sarajevo iz budžeta, u skladu sa sporazumom sa davaocem usluga.

## **Član 20.**

Kretanje kućnih ljubimaca dopušteno je u prostorima i prostorijama javne namjene uz dopuštenje vlasnika, odnosno korisnika prostora. Vlasnici odnosno korisnici objekata su dužni na vidnom mjestu istaknuti obavještenje o slobodnom uvođenju, odnosno zabrani uvođenja pasa i mačaka u objekat.

Zabranjeno je uvoditi pse i mačke u:

- objekte koje koriste organi državne uprave i lokalne samouprave,
- objekte i prostorije za zdravstvenu zaštitu građana,
- objekte i prostore u kojim se obavlja vaspitno-obrazovna djelatnost i obezbjeđuje smještaj, boravak i ishrana djece, učenika i studenata,
- objekte za proizvodnju, smještaj i promet lijekova,
- objekte za proizvodnju, smještaj i promet životnih namirnica,
- vjerske objekte,
- sredstva javnog prevoza,
- javne komunalne objekte kao što su: tržnice i pijace, groblja, cvijetnjaci, spomen obilježja,
- sportske objekte, na javne skupove, kao i druga javna mjesta na kojim se održavaju različite manifestacije,
- ograđeno ili neograđeno dječje igralište, ograđeni ili neograđeni sportski tereni, dvorišta škola i vrtića,
- ugostiteljske objekte, osim hotela koji imaju uređene prostore za smještaj pasa i mačaka.

## **DIO TREĆI**

### **REGISTRACIJA KUĆNIH LJUBIMACA**

## **Član 21.**

Registraciju kućnih ljubimaca vrši nadležna veterinarska organizacija na području općine Centar Sarajevo, u smislu trajnog označavanja pomoću mikročipa, radi identifikacije i sigurnosti držanja. Svaki registrovani pas ima svoj individualni broj i oznaku, što predstavlja njegovu ličnu kartu, čime se uspostavlja jedinstven registar pasa u općini Centar Sarajevo.

Nadležna služba općine će razviti različite oblike kampanje prikupljanja podataka o broju vlasničkih pasa, sačiniti spiskove i dostaviti nadležnoj veterinarskoj organizaciji, nakon čega će svi imaoći pasa biti obavezni da pse registruju i mikročipuju.

Zabranjeno je uklanjanje mikročipa, osim u slučaju ako za to postoji opravdani zdravstveni razlog.

## **Član 22.**

Imalac kućnog ljubimca je dužan registrirati životinju u roku od 7 dana od dana sticanja vlasništva u veterinarskoj organizaciji koja vodi registar životinja.

### **Član 23.**

Za troškove upisa kućnih ljubimaca, obaveznog označavanja - čipovanja, vakcinacije pasa protiv bjesnila, tretmana protiv parazita i izdavanja službenih isprava/dokumentacije plaća se naknada u skladu sa Zakonom o veterinarstvu u Federaciji BiH ( „Službene novine Federacije BiH“ , broj 43/13) i Cjenovnikom veterinarskih usluga na teritoriji Federacije BiH („Službene novine Federacije BiH„ broj 43/13).

Troškove naknade za veterinarsko – zdravstveni nadzor (pregled), vakcinisanje i druge zdravstvene mjere provedene od strane veterinarske organizacije snosi imalac kućnog ljubimca.

#### *Postupanje s opasnim psima*

### **Član 24.**

Imalac opasnog psa dužan je provesti sve mjere koje su propisane Pravilnikom o držanju opasnih životinja ( „Službeni glasnik BiH „ broj 27/10).

### **Član 25.**

Imalac opasnog psa mora ga držati u zatvorenom prostoru iz kojeg ne može pobjeći, a vrata u prostor u kojem se nalazi takav pas moraju biti zaključana.

### **Član 26.**

Na ulazu u prostor u kojem se nalazi opasan pas mora biti vidljivo istaknuto upozorenje: »OPASAN PAS«.

### **Član 27.**

Izvođenje opasnih pasa na javne površine dopušteno je isključivo s brnjicom i na povodcu.

### **Član 28.**

Pri sumnji da se radi o opasnom psu, ovlašteno lice je dužno zatražiti na uvid od imaoca potvrdu kojom se potvrđuje da su nad psom provede sve mjere propisane Pravilnikom o opasnim psima.

Ukoliko imalac ne pokaže potrebnu dokumentaciju, ovlašteno lice sastavlja službeni zapisnik, te obavještava nadležnu veterinarsku inspekciju za daljnje postupanje.

#### *Način kontrole razmnožavanja kućnih ljubimaca*

### **Član 29.**

Zabranjen je uzgoj kućnih ljubimaca, osim ukoliko je uzgoj prijavljen pri nadležnom ministarstvu i uzgajivač posjeduje rješenje nadležnog tijela.

### **Član 30.**

Imalac je dužan držati pod kontrolom razmnožavanje kućnih ljubimaca i spriječiti svako neregistrirano razmnožavanje. Vlasnik kućnog ljubimca je odgovoran za sve potomke svojih životinja.

### **Član 31.**

Kontrola razmnožavanja pasa i mačaka provodi se preventivnim djelovanjem:

- trajnom sterilizacijom,
- kontrolom kretanja u vrijeme tjeranja ženki,
- upotrebom veterinarskih sredstava.

Ove poslove obavlja stručno lice iz nadležne veterinarske organizacije.

## **DIO ČETVRTI**

### **NAČIN POSTUPANJA S IZGUBLJENIM I NAPUŠTENIM ŽIVOTINJAMA**

### **Član 32.**

Imalac kućnog ljubimca dužan je u roku od 2 dana od dana gubitka kućnog ljubimca prijaviti njegov nestanak nadležnoj veterinarskoj organizaciji.

Ako u roku od 14 dana od dana objave podataka imalac nije dostavio zahtjev za vraćanje životinje, sklonište postaje vlasnik životinje, te je može udomiti. Imalac izgubljene životinje dužan je nadoknaditi sve troškove kao i svaku štetu koju počini životinja od trenutka nestanka do trenutka vraćanja posjedniku.

### **Član 33.**

Zabranjeno je napuštati kućne ljubimce. Ukoliko imalac kućnog ljubimca iz bilo kojih razloga dođe u priliku da ne može brinuti o kućnom ljubimcu na propisan način, dužan je postupiti u skladu sa članom 13. ove Odluke.

### **Član 34.**

Hvatanje, prevoz, zbrinjavanje i smještaj napuštenih i izgubljenih životinja kao i pasa i mačaka lualica obavlja higijenski servis, koga u skladu sa Zakonom osniva Kanton Sarajevo ili općina Centar Sarajevo.

### **Član 35.**

U higijenski servis za životinje se, privremeno i na duži period, smještaju pronađene životinje na daljnju brigu i moguće udomljavanje:

- izgubljene životinje do vraćanja vlasniku,
- napuštene životinje kojim se ne može utvrditi vlasnik, kao i psi i mačke lualice,
- životinje kojim imalac ne može osigurati uslove držanja u skladu sa propisima i na neograničeno vrijeme.

Imalac životinje ima pravo u roku od 8 dana od dana smještanja, zahtijevati povrat životinje, u protivnom životinja se može dodijeliti drugom zainteresiranom licu.

### **Član 36.**

Troškove hvatanja, prevoza, zbrinjavanja i smještaja napuštenih i izgubljenih životinja snosi imalac životinje, a ako se isti ne utvrdi, troškovi se obezbjeđuju iz budžetskih sredstava općine kao i za pse i mačke lualice. Naknadnim utvrđivanjem vlasnika napuštene/izgubljene životinje moguće je troškove od istog namiriti. Pokrivanje troškova za uginule i eutanizirane životinje vrši se na isti način.



## **DIO PETI**

### **ZAŠTITA ŽIVOTINJA**

*Poticanje zaštite životinja*

#### **Član 37.**

Općina Centar Sarajevo će prema obavezi utvrđenoj Zakonom o zaštiti i dobrobiti životinja poticati razvoj svijesti svojih sugrađana, posebno mladih, o brizi i zaštiti životinja.

*Obaveza pružanja pomoći životinji*

#### **Član 38.**

Svako ko ozlijedi ili primijeti ozlijeđenu ili bolesnu životinju mora joj pružiti potrebnu pomoć, a ako to nije u mogućnosti sam učiniti, mora joj osigurati pružanje pomoći.

Ako nije moguće utvrditi ko je imalac životinje, pružanje potrebne pomoći ozlijeđenim i bolesnim životinjama zatečenim na području općine, vršiće veterinarska stanica.

Ako se utvrdi vlasnik ozlijeđene ili bolesne životinje, troškove snosi vlasnik.

## **DIO ŠESTI**

### **NADZOR**

#### **Član 39.**

Nadzor nad provođenjem odredbi ove Odluke vrše nadležni organi, svako iz svoga djelokruga rada; komunalni redar i komunalni inspektor općine Centar Sarajevo u saradnji sa komunalnim inspektorom Kantona Sarajevo, veterinarska inspekcija Kantona Sarajevo, organ nadležan za poslove upravljanja i održavanja zajedničkih dijelova zgrada kao i pripadnici MUP-a Kantona Sarajevo, II Policijska uprava Centar.

Ovlaštena lica iz stava 1. ovog člana postupaju po službenoj dužnosti kada uoče postupanje protivno Odluci, te prema prijavi fizičkih ili pravnih osoba.

Komunalni redar i komunalni inspektor općine Centar Sarajevo u saradnji sa kantonalnim komunalnim inspektorom vrše nadzor nad provođenjem odredbi člana 3. tačka 5., člana 11., članova 15., 16., 17., 18., 19. i člana 27. ove Odluke.

Kantonalni i općinski komunalni inspektori, svako u okviru svoje nadležnosti će u slučajevima kršenja odredbi ove Odluke pokrenuti prekršajni postupak protiv okrivljenog podnošenjem zahtjeva za pokretanjem prekršajnog postupka pred nadležnim sudom, u skladu sa Zakonom o prekršajima Federacije BiH („Službene novine Federacije BiH“, broj 31/06 ).

Pripadnici MUP-a Kantona Sarajevo, II Policijska uprava Centar Sarajevo, u skladu sa svojim ovlaštenjima i nadležnošću propisanim Zakonom o prekršajima protiv javnog reda i mira („Službene novine Kantona Sarajevo“, broj 18/07 i 7/08 ), vrši nadzor nad provođenjem odredbi člana 10., člana 12., stav 1. i 2., člana 14., člana 20., člana 25., člana 26., člana 38. stav 1.

Organ nadležan za poslove upravljanja i održavanja zajedničkih dijelova zgrada - upravitelj sa predstavnicima etažnih vlasnika, vrši kontrolu provođenja odredbi iz člana 5., člana 6., člana 7., člana 8., i člana 9.

Veterinarska inspekcija u skladu sa svojim ovlaštenjima utvrđenim Zakonom o zaštiti i dobrobiti životinja („ Službeni glasnik BiH“, broj 25/09) i Zakona o veterinarstvu Federacije BiH („Službene novine Federacije BiH“, broj 46/00), vrši nadzor nad

provođenjem odredbi člana 3., člana 4., člana 12. stav 3. i 4., člana 13., člana 14., člana 21., člana 22., članova 28., 29., 30., 31., 32., 33., 34., 35., 36. i člana 38.

Ako se u vršenju nadzora ovlaštenom licu onemogućiti da izvrši pregled pružanjem fizičkog otpora ili ako se takav otpor osnovano očekuje, ovlašteno lice će tražiti pomoć/asistenciju nadležnog organa policije.

## **DIO SEDMI**

### **NOVČANE KAZNE**

#### **Član 40.**

Novčanom kaznom od 200 KM kaznit će se za prekršaj fizičko lice ako postupi protivno ili se ne pridržava odredbi člana 5. stav 2., i člana 10., a što se odnosi na zaštitu sigurnosti građana i njihove imovine i narušavanja javnog reda i mira.

Novčanom kaznom od 200 do 500 KM kaznit će se za prekršaj odgovorno lice ako postupi protivno ili se ne pridržava odredbi člana 8., člana 9., člana 12. stav 1. i 2. Novčanom kaznom će se kazniti imalac kućnog ljubimca ako:

1. nije osigurao kućnom ljubimcu držanje u skladu s njihovim potrebama, a minimalno predviđenim Zakonom o zaštiti i dobrobiti životinja i Odlukom općine Centar Sarajevo,
2. psu nije osigurao prostor koji odgovara njihovoj veličini, te ga nije zaštitio od vremenskih neprilika i drugih nepovoljnih uvjeta držanja,
3. nije na vidljivom mjestu staviti oznaku koja upozorava na psa, te ne posjeduje ispravno zvono na ulaznim dvorišnim ili vrtnim vratima,
4. redovito ne čisti i ne održava urednim prostor u kojem boravi kućni ljubimac,
5. istrčava kućnog ljubimca vezanjem za motorno prijevozno sredstvo koje je u pokretu,
6. trajno drži kućnih ljubimaca na adresi različitoj od prebivališta ili boravišta posjednika, osim u slučaju kada se radi o radnim psima koji čuvaju neki objekt ili imovinu. Posjednik će se kazniti ukoliko psu ne osigura svakodnevni nadzor,
7. imalac kućnog ljubimca ne drži na način da ne ometa mir sustanara ili na drugi način krši dogovoreni kućni red stambene zgrade i stanara okolnih nekretnina,
8. psa izvodi na javne površine gdje to ovom Odlukom nije dopušteno, te ukoliko pas nije označen mikročipom, na povodcu i pod nadzorom posjednika,
9. dozvoli da se kućni ljubimac kreće slobodno ili na povodcu na dječjim igralištima, cvjetnjacima, neograđenim sportskim terenima, neograđenim dvorištima škola i vrtića te na drugim mjestima gdje postoji opasnost ugrožavanja zdravstveno - higijenske sigurnosti i zdravlja ljudi bez dopuštenja vlasnika i dozvole korisnika prostora,
10. omogući kućnom ljubimcu da samostalno šeće javnim površinama bez njegove prisutnosti i nadzora,
11. pri izvođenju kućnog ljubimca na javnu površinu ne nosi pribor za čišćenje i ne očistiti javnu površinu koju njegov kućni ljubimac onečisti,
12. vlasnik opasnog psa ne drži u zatvorenom prostoru iz kojeg ne može pobjeći, a vrata u prostor u kojem se nalazi takav pas nisu zaključana,
13. izvodi opasnog psa na javne površine bez brnjice i na povodca,
14. ne drži pod kontrolom razmnožavanje kućnih ljubimaca i ne spriječi svako neregistrirano razmnožavanje.

**DIO OSMI**

**PRIJELAZNE I ZAVRŠNE ODREDBE**

**Član 42.**

Ova Odluka stupa na snagu danom objave u „Službenim novinama Kantona Sarajevo“.

**Član 43.**

Vlasnici ili imaoци kućnih ljubimaca, dužni su njihovo držanje uskladiti sa odredbama ove Odluke u roku od 60 dana od dana stupanja na snagu ove Odluke.

Broj:01-49-940/18

Sarajevo,09.05.2018.godina



**Predsjedavajuća Općinskog vijeća**

Karolina Karačić